




MISA CON NIÑOS 22 de abril de 2018 Domingo 4º de Pascua-B



Evanxeo de san Xoán 10, 11-18:

“O bo pastor dá a súa vida polas ovellas”.

**Mensaxe: O BO PASTOR dá a vida
para unir as ovellas.**

1. ACOLLIDA

Irmáns e irmás:

Neste cuarto domingo de pascua, o evanxeo preséntanos a **Xesús como o Bo Pastor**, como o único guía seguro que nos vai abrindo o camiño. El coñécenos a cada un, chámanos polo noso nome e ámanos un a un, ata nos momentos máis difíciles ou dolorosos da vida. Xesús deu a súa vida por nós e séguea dando cada domingo feita pan renxedor, fresco, que nos fai fortes na eucaristía. Neste domingo anterior ao mes de maio, mes da Virxe, pedimos á Divina Pastora e aos nosos pastoriños que nos preparen para a novena, e que coiden de todos nós.

(No panel colocamos un debuxo do Bo Pastor. Debuxamos unha ovella graciosa e dámoslle unha copia a cada neno onde escribirán o seu nome. Ao final podemos regalarlle unha ovelliña a cada neno que facemos ou mercamos. Ofrecémola no ofertorio).

No nome... **-Que a graza do noso Señor Xesucristo, o noso pastor, camiño e vida, sexa con todos vós.**

2. PETICIÓNS DE PERDÓN ou ASPERSIÓN

Pidamos perdón ao Señor:

- * A ti que es o Bo Pastor e deches a túa vida por todos nós, pedímosche: *Señor, ten piedade de nós.*
- * A ti que es o Pastor e gardián das nosas vidas, rogámosche: *Cristo, ten piedade de nós.*
- * A ti que cargaches cos nosos pecados e curaches as nosas feridas, che decimos: Señor, ten piedade de nós.

(En vez do momento de perdón pódese realizar a aspersión):

Comecemos a celebración recordando o noso bautismo, aquel momento en que entramos a formar parte da comunidade dos seguidores de Xesús (*Aspersión cun canto bautismal*).

-Que Deus todopoderoso nos purifique do pecado e, pola celebración desta Eucaristía, nos faga dignos de participar no banquete do seu Reino. Amén.



3. MONICIÓN ÁS LECTURAS

Na primeira lectura escoitaremos o testemuño de Pedro e os apóstolos trala Resurrección de Xesús, un acontecemento que transformou a súa vida enchéndoo de fe e ledicia e por iso invitan a todos a unirse á nova comunidade. A Carta de san Xoán é unha invitación a seguir a Xesús en concreto, con feitos, non só con Boas palabras. No evanxeo tamén Xoán nos di que imos pola vida seguindo a Xesús que é o noso Pastor e guía, o Camiño, a Verdade e a Vida.

4. CREDO OU RENOVACIÓN DAS PROMESAS BAPTISMAIS:

-Renunciades ao pecado para vivir verdadeiramente como fillos de Deus? *Si renuncio.*

-Renunciades a todas as obras do mal na vosa vida. *Si renuncio.*

-Renunciades a vivir pensando só en vós mesmos, esquecéndovos dos demais e de Deus? *Si renuncio.*

-Creedes en DEUS PAI cuxa palabra liberadora sostén a vida das persoas e o seu traballo creador. Porque El é a Vida?

-Sí Creo

-Creedes no seu FILLO presente entre nós que camiñabamos en tebras e nado entre os máis pobres para manifestar o amor a Deus. Porque El é o Señor?

- Credes no ESPÍRITO SANTO que nos fixo renacer á vida de Deus e que nos enche de forza e valor nas nosas loitas por seguir a Xesús. Porque El é o Amor?
- Credes na IGREXA, posta ao servizo dos homes para que todos reciban a plenitude de Deus. Porque ela é mensaxeira de Boa Noticia?
- Credes na VIDA ETERNA de todas as testemuñas do amor de Deus no mundo. Porque esa é a nosa Esperanza?
Esta é a nosa fe, a fe da Igrexa, a que se proclamou no noso bautismo e que agora renovamos.

5. PETICIÓNS

Necesitamos que o Pastor Bo nos atraia cara a el, nos faga escoitar a súa voz e nos dea a súa vida. Por iso pedímoslle:

-Bo Pastor, acompañanos e guíanos. /Nai do Bo pastor, roga por nós.

1. Para que as nosas parroquias sexan comunidades vivas, unidas, abertas e acolledoras, nas que se sinta a presenza de Xesús. *Oremos.*
2. Para que os pastores da Igrexa e os catequistas vivan a súa fe con ilusión e anuncien coa Boa Noticia de Xesús. *Oremos.*
3. Para que coñezamos mellor a Xesucristo, o noso Pastor, escoitemos a súa voz e sigámolo docilmente. *Oremos.*
4. Polas nais, os sacerdotes, os educadores, profesores e catequistas: para que imitemos ao Bo Pastor coa nosa tarefa calada pero imprescindible para o desenvolvemento da persoa e a integración na sociedade. *Oremos.*
5. Polos que celebramos a eucaristía para que vivamos sendo luz, acollida e perdón. *Oremos.*
6. Polos mozos e mozas que se prepara para o sacramento da confirmación, a forza do Espírito, para que sempre sexan testemuñas de Xesús e se alimenten cada domingo co Pan da Eucaristía. *Oremos.*

En ti, Señor, poñemos a nosa confianza. Guíanos, cúranos, énchenos da túa ledicia. Por XCNS.

6. OFRENDAS (escoller)

-A CRUZ DO BO PASTOR: O Papa Francisco usa unha cruz co Bo pastor e as ovellas. O Espírito, simbolizado na pomba, regálanos os dons e carismas que nos complementan e nos unen. O rabaño é o pobo de Deus que segue a Cristo no seu camiñar. Cristo, é o Bo Pastor, que dá a vida e recolle á ovella extraviada. Señor, sé o noso pastor, dános o teu Espírito.

-UN ROSTRO DE XESÚS BO PASTOR: Xesús Pastor que dá a vida que coída e guía é modelo para os nosos pastores. Hoxe damos grazas a Deus polo noso sacerdote e por todas aquelas persoas responsables de tantas tarefas pastorais que realizamos na nosa comunidade parroquial.

-UNHAS OVELLIÑAS (*cada neno ofrece unha ovelliña co seu nome*): Ofrecemos estas ovellas de papel que expresan o noso desexo de seguir a Xesús sempre e de formar un gran rabaño, unha gran familia en torno a el.

-ZURRÓN CUNHA BIBLIA: Tamén che presentamos este zurrón cunha Biblia. A Palavra de Deus é a forza do Bo Pastor e de todos os consagrados ao Señor. Con esta ofrenda queremos entregarche, Señor, a vida de tantas persoas que día a día viven e se entregan por ti.

-PAN E VIÑO: Cada domingo Cristo faise Pan saboroso e quente que alimenta a nosa vida que fortalece a nosa fe e nos une a el e aos irmáns e irmás.



7. VÍDEOS OU PPW PARA ESTE DOMINGO: domingo de Pascua 4º-B.

-O Bo Pastor e teño outras ovellas, película: <https://www.youtube.com/watch?v=5TKUJgHvelo>

-O Bo Pastor, debuxos: <https://www.youtube.com/watch?v=EP-4mzfAETg>

-O Señor é o meu pastor, Nico Montero, canción: <https://www.youtube.com/watch?v=s8fcWH5OkCc>

-Dálle a volta, reflexión: <https://www.youtube.com/watch?v=VpO50J-F55w>

-Enfocar a vida, reflexión: https://www.youtube.com/watch?v=yK_uVmfDsNs

-Un só rabaño e un só pastor: https://www.youtube.com/watch?v=Rq1_lkawMrY

-O Bo Pastor, debuxos: <https://www.youtube.com/watch?v=Z8SqXwaZA4M#t=77>

-Amigo, canción: <https://www.youtube.com/watch?v=RtaWbN2aM9o>

8. SUXESTIÓNS

- No panel colocamos un debuxo do Bo Pastor. Debuxamos unha ovella graciosa e dámoslle unha copia a cada neno onde escribirán o seu nome. Ao final podemos regalarlle unha ovelliña a cada neno que facemos ou mercamos. Ofrecémola no ofertorio dicindo: Ofrecemos estas ovellas de papel que expresan o noso desexo de seguir a Xesús sempre e de formar un gran rabaño, unha gran familia a carón del.

